

# قلوب شاعر

للشاعر / مجدى حسن



حقوق الطبع والنشر محفوظة

لدار الأدبا



اسم الدار	دار الأدباء للنشر والتوزيع
ديوان	قلب شاعر
للشاعر	مجدى حسن
رقم الإيداع	(٢٠١٧/٢٠٧٨٨) بدار الكتب المصرية
الإخراج الفني	دار الأدباء. (عبدالرحمن الصباحي)
الغلاف	من تصميمات الدار

# إهداء

الى أول قارئه لأشعارى  
الى من علمتنى ان أحب عطاء  
فقط عطاء..

اهدى ديوانى الأول الى روحها الطاهرة.

الشاعر: مجدى حسن

## المقدمة:

الشعر العامى : هو الشعر المنسوب الى اللهجه العاميه .. وهى اللهجه التى تتكلمها عامة الناس فى حياتهم اليومية ويطلق الشعر العامى على كل نظم بلهجه غير اللغة العربية الفصحى فأى شعر خلاف الشعر الفصيح يطلق عليه شعر عامى أو شعر شعبى بلغة اهل البلد الدارجه.

وتخرج من الشعر العامى..الأغانى الشعبيه والتراثيه التى تعبر عن عادات وتقاليد كل شعب من الشعوب العربيه.

وعليه فقد خرجت من فنون الشعر العامى انواع منها :

الهجج: وهو الغناء الخفيف المنتشر بالاغانى الشعبيه واغانى الافراح والفلكلور الشعبى .

الرجز: وهو التطريب وانبثق منه فن الانشاد وفن الموالم .

\*\*\*

ونحن نصول ونجول داخل صفحات ديوان ( قلب شاعر ) للشاعر المتميز مجدى حسن نجد انه وقف على ناصية معسول الكلام وتمكن من خواص وجماليات اللهجه المصريه بجداره وذلك عندما امسك بقلمه وابحر فى عالم الرومانسيه فأخرج لنا درر ثمينه تستحق ان يفتح لها بوابات القلوب لتدخل منه على احساس ومشاعر القارئ المحب للشعر العامى .

ونحن نتجول فى ديوان ( قلب شاعر ) استوقفتنى هذه القصيده الرائعه والتى عنونها الشاعر واطلق عليها اسم (( شريط ذكريات ))  
استهل الشاعر القصيده وهو يقول بلسان حاله:

حاولتى كتير تنسينى اللى فات

وقلتي الماضي كان عايش ومات

لقيت ايامى محفوره

لقيتها صوره ..ورا صوره!!

مشهد ممتع ونادر ولكن الشاعر جسده بأثقان وهو يقول لمن ارتبط بها  
بأنه مازال متذكر حبه القديم الذى طبع فى ذهنه صور ذكريات متتابعه  
لا ينفك ان ينساها .. ولم تستطيع تلك الأخرى ان تنسيه محبوبته  
الأولى .. قمة الرومانسيه المفرطه مع الاخلاص النادر الوجود .

وكل دقيقه فى الماضى على شريط ذكريات

واقارن بين لياليكى .. ولياليها

واحساس روى بعينيكى وبعينيها

واحساس لمستى ايديكى .. واحساس لمستى ايديها

مش حكيت اول كلامى واعترفت بحبها

قلتي هينسيك غرامى كل لحظه عشتها

قولتلك كانت هوايا والنجوم اللى ف سمايا

عاشت الايام معايا شمس روى وضلها

رغم انك بتعيشينى .. وف عيونك خبتينى

روى كانت بتسهينى تاخذ الحلم وحنينى

كل لحظه من سنينى وتجرى تسكن حلمها

وهنا يبدأ الشاعر فى المقارنه بينها وبين اخرى ويقول اقارن بين لياليكى  
ولياليها .

واحساس روى بعينيكى وبعينيها

واحساس لمستى ايديكى واحساس لمستى ايديها

ما ترك شئ من تفاصيلها الا وقارن بينها وبين الأخرى



وقد جاءت لحظة الاعتراف  
مش حكيت اول كلامى واعترفت بحبها..!!

ويسرد الشاعر قائلاً عن حبها الذى مازال يعترف به..فياله من حب اخذ  
فى التمكن من غرف القلب وجوانحه

قللتك كانت هوايا والنجوم اللى ف سمايا  
عاشت الايام معايا شمس روحى وضلها  
رغم انك بتعيشينى .. وف عيونك خبتينى  
روحى كانت بتسهينى تاخذ اللحم وحنينى  
كل لحظه من سنينى وتجرى تسكن حلمها

وكانه يذكرنا بقيس ليلى وهو الهائم على وجهه فى الشوارع والطرقات  
يقول:

اشتكت منى الشوارع  
سبت بيت وسكنت شارع  
تهت عن فجرى اللى طالع  
فجرى كان مع فجرها  
اتعلمت معاها اول كلمة حب  
وسمعت ف دنياها اول دقة قلب  
لو فكرت انساها صعب ومليون صعب

الصعوبه فى ذلك تكمن فى أن للشاعر قلب ينبض بحب قديم لا يستطيع  
ان يتبرأ منه فقد نبت فى قلبه واصبحت جذوره ضاربه فى الوجدان لقوله  
سمعت فى دنياها اول دقة قلب .. فقد ولد حبه الأول على يدها فكيف له





ان ينساها أو تنسيه اخرى هذا الحب الذى تعلم معه هجاء اول كلمات  
الحب الصادقه .

وعشان يرتاح ضميرى خرّجتك من مصيرى

يمكن لو سيبتى حضىنى تعيشى حضىن غيرى

لآخر سطر فى كتابى هعيش راهب فى محرابى

صورتها وشم على بابى حبيبتى وليا اسبابى ..!!

اعلن الشاعر رهبنيته .. ورفض ان يقايد حبه القديم

ما اعظم التضحيات .. وصدق المشاعر لدرجة ان الشاعر رسم لنا  
صورهتصريحه غايه فى الروعه وهو يقول (صورتها وشم على بابى)  
ليصرح بأنه لن ينسى حبه الأول فهى وشم لن يفتلح فقد نقش على بابه  
والقصد هنا باب قلبه وله بالطبع أسبابه فى التضحية كونه محب عاشق  
طاهر القلب عفيف المشاعر وهذه صفات المخلصين .

ونختم فنقول: كتبت قصائد هذا الديوان بلهجه رقرقه تميز بها الشاعر  
فصاغ بها مفرداته .. لدرجة اننا تعاشنا مع قصته الغراميه وصوره  
الجماليه الموحيه والتي دخلت علينا القلب كونه كتبها بأحاساس خارج من  
قلب شاعر .. فمست منا شرايين الوتين .

تقديرى لعبقريه شاعرنا المتميز .. متمنياً له الرفعه ومزيد من التوفيق.

د . سيد غيث ..





## أصدقاء !!..

يعنى ينفع نبقى تانى أصدقاء؟  
ما احنا كنا اصدقاء  
كنت ليه خليتنى احبك قلت ليه  
الحب هيكون احتواء  
يعنى ننسى لمسة الايد اللي بيئنا  
واللا ننسى حضن بينور سنيئنا  
واللا ايام يوم فرحنا ويوم حزنا  
دا انت شاعر انت فاكر عندي مفتاح للمشاعر  
يوم حبيبي يوم صديقي يوم غريب شفته ف طريقي  
القي بُعدك عنى عادى واخفى جوايا الحريق  
بحر شفت سطحه هادى انزله القاه غريق  
لا وحبك لا وقلبك مش هنفذ حكم اعدام البرئ  
إما بس تكون حبيبي او نقول للشمس غيبي  
هوا يعنى عشان عشقتك اد روحى  
يبقى همك كل همك قتل روحى





الحياه كانت حياه لما كنت معايا فيها  
فيها فرحه وفيها آه بس بوجودك ماليتها  
اتقفل باب العتاب والسؤال مالهوش جواب  
وف كتاب الحب اول سطر كنا  
شلت اسمى ليه فى لحظه م الكتاب  
مش صحاب مش صحاب عمرنا ما نكون صحاب  
مش صحاب مش صحاب ايوه بعدك قمرى غاب  
بس هاخذ حقى منك كله فى يوم الحساب





## كر سين وشمسيه ..!!

وبان الحزن في عينيه على عاشق غدر بيا  
وقلت ابعدا روح لبعيد وتبقى القصة منهيه  
وكانت شنطتي فيها حاجات ما فيهمش حنيه  
انا والرمل والميه وكرسين وشمسيه  
في حوض الموج لقيت سمكه حدفها الموج لرجليا  
كان السمكه عاشقاني ومحتاجه ملاغيه  
بتحكي لي وبسألها نسيته واللا منسيه؟؟  
عنيها تقول قتيل الشوق مالوش لا حقوق ولا ديه  
ولحظه غمّضت عيني يدوب غمضتها شوبه  
لقيت السمكه مع غيرها وفجأه سابوني وحدّيا  
انا وطوفان من الذكرى ورعشة عشق فاديا  
حببتي اللي سايبها هناك معايا ف شنطتي جايه  
وذكرى قصه عشناها في شراييني معديه





وفجأه سمعت صوت جنبي وبیدندلی اغنيه  
زمان کنا سمعناها عشقناها انا وهيا  
لقيت ع الكرسي قدامي حبيبتی للهوی جايه  
وجايه معاها احلامی بتشرح عذرها ليا  
عرفت ان الهوی عمرين يضيع ازاي ف سفریه  
وليه انا جبت كرسيين مجبتش بس كرسيًا





## حب كبير...!!

كنت بحبك حب كبير حب قدر وابد ومصير  
يعنى ماكنتش لحظه اتصور انى ف يوم هنساك واتغير  
وانى ف يوم على بعدك هقدر واكسر باب العش واطير  
انا كنت طير فرحان بأسره وبسمك احلى الأنغام  
وحبى ليك الكون بأسره وكلام عيونك احلى كلام  
تعالى نسأل العشاق تعالى نسأل الأشواق  
مين العاشق ومين فينا رسم سكة دموع وفراق  
مين اللى حب من قلبه ومين الحب كان ذنبه  
ومين عاش للهوا فينا ومين ادا الحبيب بسخاء  
بيشهد كل شئ بيننا ايدينا قلوبنا وعيوننا  
وكل ركن من بيتنا وكل مخدّه شالتنا  
ونجمه ف ليله صحبتنا تنور لينا سهرتنا  
ولحظة فرح عشناها ولحظة حزن عاشتنا  
ما كنت غرامك الأكبر وكنت لشايك السكر  
وكنت تنام وانا اسهر اشاركك حلمك الأخضر





فاكر كنت ازاي ويايا كنت لعمرى امل وطريق  
كنت بحبك من جويا قلبك بحر وقلبي غريق  
واتغيرت بقيت انسان غير اللي عرفته وحببته  
راح الاخضر م الالوان هديت اجمل حلم بنيته  
زى ما بعت انا بعت غرامك ونسيت ايامى وايامك  
ونسيت مد الايد لسلامك ونسيت فرح العيد بكلامك  
سبت معاك فى العش عواطفى سبت هواك وحنانى وعطفى  
يا خسارة عمر فات يا خسارة عمر جى  
يا خسارة حلم مات وكان جويا حى






## مسك وعنبر ..!!

ايوه ضعفت لما قابلت عينيكى وشفت  
فيها طريق مكتوبلى امشيه بحر غريق لازم اعديه  
ايوه عشقتك لما قابلتك ودخلتى القلب ملكتيه  
كل كلام الحب لاقيته مش هيوصلك معانيه  
اصل الحب اللى انا حبيته ساكن فيا وساكن فيه  
حبك غير كل مافيا نور ايامى ولياليا  
خلى دموعى دموع افراح بعد ما كنت غريب سواح  
بظلم نفسى واحضن ياسى صدر لقيته عليه بارتاح  
رجعتينى لأحلى سنينى حبك عالج كل جراح  
رمشك غير لون الكون اصله بيحرس احلى عيون  
طعم شفایفك اصل السكر خدك ورد وجسمك مرمر  
لما تمرى ولو فى خيالى بتفوح ريحة مسك وعنبر





علمتيني اعشق واتحب رجعتيني لدق القلب  
قُربك حب بُعدك حب كل ما فيكي حاجات تتحب  
خليكي ف حضني وخليني علشانك اتحدى الصعب  
لو هتغيبي ف يوم عن عيني تبقى ظلمتي الروح والقلب  
بُعدك حب قُربك حب





## الخاين مش هوانا !!..

مخدة الخيانه كانت دائماً معنا  
تشهد على صدق حبي واخلاصي ف هوانا  
وف ليله جيت اقبالك لقيت عليها غيري  
لقيتها نايمه جنبك في حضنك وف سريري  
بتقول نفس الكلام في عيونها وشعرها  
وبأشعار الغرام بتسمم عقلها  
لقيتني ف غربه تايهه وبسأل عن مصيري  
ازاي سلمته نفسي واديته ضي شمسي  
واسأل من كتر يأسى معقول بيحبها  
لقيتني بجري وحدى ودموع بتشق خدى  
نفسى تبلعنى ارضى وما اشوفش بعدها  
بخلت عليك بايه هتاخده منّها  
وليه بتخون وليه ليالينا بعثها  
الخاين مش هوانا فى دمك الخيانه





الحب بيهدي روحنا للصدق والامانه  
بتقطف كل زهره و تشرب من عبيرها  
وترجع تانى بكره وتقطف زهره غيرها  
لابتهمك دموعها ولا يهمك مصيرها  
بندم على كل ليله فى حضنك عشتها  
كانت احاسيس جميله خنت و ضيعتها  
يحرم عليك حبي طول عمري يا قلبي  
مش هتخدع تانى صبرنى ياربى






## خلود...!!

انا ليك لوحدهك ولا حد بعدك ولا حضن  
غيرى من حضنى ياخذك  
طمئن عينيك انا عايشه بيك مع ان قلبى حزين عليك  
واحنا بنبدأ حلمنا كان بعدنا مكتوب لنا  
لا بعدنا يوم عن بعضنا ولا كان فراقنا بيدنا  
على اد شوقنا وحبنا الموت كان اقوى منا  
كتب علينا نفترق تسبقنى عند ربنا  
كنت اتمنى تاخذ روحى اموت وياك  
كنت اتمنى يوم ما خدوك ياخدونى معاك  
كنت اتمنى تاخذ عقلى عشان انساك  
او تستنى احلم ليله ف حضن هواك  
ماليش خلاص بكره وهعيش على الذكري  
على ماضى ايامنا ويجرا مايجرا  
امسح دموعك ابتسم خلىنى وياك ابتسم  
بفرح اوى لما ابتسامتك ع الشفايف تترسم  
تعالى فى الاحلام سمعنى احلى كلام  
لو لحظه نتلاقى ونرجع الايام





اوقات كثير بنظير سوا روحين على جناح الهوى  
لما الملايكه يحرسوك ولحد عندى بيجيبوك  
بيسدونى ويسعدوك وف الميعاد بيرجعوك  
حاسه بأديك بتضمنى بعينيك تقول اطمنى  
متيأسيش ولا تحزنى فى الجنه قصر بيتبنى  
مكتوب لاحلامنا الخلود مبقاش بيحكمها الوجود  
لا ف يوم تفرقنا السدود ولا للزمان يوم ننحنى





## شهرتلك..!!

لما انتى مش حسانى دخلتى ليه شريانى  
بنيت عليكى أمانى و ف لحظه الحلم ضاع  
شهدتلك انك خبيره فى الخداع سلمتلك  
سلمتى قلبى للضياع

لما سلمت لهواكى وابتديت احلم معاكى  
بعتى قلبى اللى اشتراكى واشتريتى قلب باع  
صدر قلبك زى اسمك زى صوتك زى رسمك  
يعنى كل حاجه فيكى كل نظره من عنيكى  
كل لمسه من اديكى كل وقت وله قناع  
كان عشانك مش عشانى لما دخلتك زمانى  
كنتى محتاجه لحنانى كنتى محتاجه لشراع  
كنتى مجروحه وداويتك كنتى عطشانه ورويتك  
كنت ضلك كنت بيتك عشتى جوايا ورعيتك  
بعت عمرى واشتريتك والثلثن كان الوداع  
شهدتلك انك خبيره فى الخداع سلمتلك  
سلمتى قلبى للضياع





## حبینی ..!!

ادیکی عمری ضیفیه علی عمرک بس اوعدینی  
اموت علی صدرك  
حبینی أد ما تقدری خایف فی یوم تنغیری  
عشقتنا وعشقنا الأيام معقول فی هجری تفکری  
شفتک وقلت هتبقی حاجه وبقیتی عندی کل حاجه  
بقیتی احساسی نبضی وانفاسی بقیتی انا تنصوری  
مبقتش عایش غیر عشانک مبقتش حاسس غیر حنانک  
وکأنی مولود النهارده وکأنی غصن لأحلی ورده  
وکأنی فتحت عنیا شفت القمر جای علیا  
خد ایدی لجزیره أحلام مزروعه حب وحنیه  
حبینی کمان وکمان وکمان حبینی ف کل زمان ومکان  
حبینی بعقلک أو بجان حب ابيض واسود أو ألوان  
حبینی بإحساس الانسان أو عشق الطیر وملوک الجان





حبينى لحضنك ضميني خبيني ف حضنك م الأحزان  
حبينى ف حضنك دفينى ما هو حضنك غير كل الأحضان  
يقوينى ويخلينى على كل ملوك الكون سلطان  
حبينى أد ما تقدرى خايف فى يوم تتغيرى  
عشقتنا وعشقنا الأيام معقول فى هجرى تفكرى





## میت اکلینکی !!..

كان لسه علينا بدرى كان ليكى سنين فى عمرى  
كان ليكى نصيب فى ليلي وليكى ضوء فى فجرى  
من بعد ما عشت ليكى انا ميت اكلينكى  
وبقيت بره الحياه  
كنتى الاحلام وحبى كنتى الشريان لقلبي  
وبدايته ومنتهاه  
كنتى بتتنفسىلى وبتملى عليا ليلي  
كنتى سفرى ودليلى أرض العمر وسماه  
كنتى الناس اللي ليا دمعى وضحكة عنيا  
نبض ف شريان اديا وجع القلب ودواه  
سبتينى غريب فى بيتى لما ف لحظه اختفيتى  
وبفراقك قضيتى ع العهد اللي قطعناه  
اضحك والضحكه دايماً بتكون صرخة عذاب  
واسأل وسؤالى دايماً سؤال ملوش جواب





وافضل واخذك في حضي لو حتى شعري شاب  
كان ايه سبب فراقنا بعد ما كنا اتفقنا  
هنكمل عمرنا في حضن بعضنا  
لا زمان يقدر علينا ولا خوف يسكن عينينا  
مين فينا خان قلوبنا مين ههد عشنا  
هنعيش تاني الحياه لا والف لا  
مين فينا يسامح التاني مين كان في الحب أناني  
مين باع حلمنا في ثواني مين دمر حلمنا  
مبقاش نبض في عروقي بمقتش بشوف طريقي  
بشوف الكون تابوت بعيش جواه واموت  
وبسمع صوت ندايا يشبه السكوت  
حاسس لمسة اديكي فاكر نظرة عنيكي  
قلبي بينده عليكى ويقولك مش ناسيكي  
من يوم ما بعدتى عنى وانا ميت اكلينيكي






## حب مجرد .. !!

اتعلمنا كثير من بعض لما بقينا بنشبه بعض  
اتعلمنا واتكلمنا إلا عن الأشواق في البعد  
لما شفائفي حزنوا شفائفك خدوا ومنها وادوها كثير  
نفس الضحكه نفس الهمسه نفس القدره على التعبير  
كنت غريب ولقيتك وطنى ولقيت بين احضانك سكنى  
كلمتنا بنطقها سوا فرحتنا بنقسمها سوا  
عشنا حياتنا كل حياتنا حتى الذاد والميه هوى  
اول لمسها ولحن جميل عزفه معانا ساعتها النيل  
شهدناه على عهد ما بيننا شاف صدقنا ساكن فى عيوننا  
شهدناه على حلم سنيننا وعلى قلوب فى الهوى بتميل  
كل مشوفك بشتاق اكثر بشتاق اكثر واكثر واكثر  
اصل الحب ما بيننا جديد جالنا وجاب وباه العيد  
خللا شموع لياينا تايد بيزيد يوم عن يوم وبيكبر  
كل ما فىا بينطق اسمك بعشق روحك واعشق جسمك  
أجمل نظره واجمل بسمه وعلى شفائفي كثير بيتسمك  
حب جديد وظهر ع الأرض خللا الدنيا جنانين ورد





كان مخلوق لنا لوحدنا ببعوض حرمان في ماضينا  
معرفة هوش عشاق قبلنا ولا عرفوش من بعدنا حد  
حب بجد بجد بجد مش أوهام و ف يوم تنهد  
أجمل فرحه بأجمل وعد أجمل ضحكه وأجمل خد  
سحريون قلب حنون بيدفوني ف عز البرد  
بدعي ياربي تفضلي جنبي ولا نحتاج لسؤال ولا رد  
اتعلمنا كثير من بعض لما بقينا بنشبه بعض  
اتعلمنا واتعلمنا إلا عن الأشواق في البعد





## بطلة قصتك ..!!

كان حلم ومش حقيقه ما انا كنت زمان بريئه  
مات الحلم ف دقيقه وفارقت مخدتك  
لياليك كانت جميله اجمل من الف ليله  
كنت ف عينك اميره كان حبي قضيتك  
كنت بتسهر عشاني وبتشرب من حناني  
لو اغيب عنك ثواني بتحس بغربتك  
كنت بتكتب فى وصفى عن حزن جميل يدفى  
كنت بتعشق شفائفى كات هى فاكهتك  
كانت نظرة عيونى تحييك وتموتك  
احلام عقلى وجنونى بترسم خطوتك  
مش هيا لهفتك ولا ديا لمستك  
ولا دى فرحة لقانا ولا دى حنيتك  
مبقاش شئ فىا عاجب وبقيت بتأدى واجب





مبقتش خلاص حبيبتك ولا بطلا قصتك  
اديت على اء ما اءدر من غير ما احسب وافكر  
ياما كنت ف حزنك اسهر كان حضى دنيتك  
وانا وانت ف حزن بعض نزلت انت الستاره  
على كلمة شوق وبعء نزلت منغير اشاره  
كان حلم ومش حقيقه م انا كنت زمان بريئه  
مات الحلم ف دقيقه وفارقت مخدتك



## انتى وانا ..!!

كنا هنا انتى وانا شاهد علينا حلمنا  
الشط شاف طفلين سوا أو عصفورين عشقوا الهوى  
قاعدين على الرمل الصديق وادين بريئه ف ايد برئ  
كانت حبيبتى وقتها بتخاف أوى على عشا  
نبنى البيوت وتهدها الموجه نبى زيه  
وكنا نلعب ولما نتعب بأدينا نسند بعضنا  
انتى وانا.....انتى وانا

رسمنا للحب جناحين مكتوب عليهم كلمتين  
اسمين لأصغر عاشقين مكتوب عليهم اسمنا  
كان بين قلوبنا اوفى وعد هنعيش كدا ساكنين فى بعض  
لا ف يوم يفرق بنا حد ولا أقوى موجه تهدنا  
وكبرت والحب معايا أحلامى كبرت جوايا  
ورسمت شمس وضلايه وكان ما بينهم عشنا  
انتى وانا.....انتى وانا



وفجأه فتحت عينيا مالقيتش ايدك فى اديا  
لا بقيتى جنبى زى زمان ولا دنيتى صبحت هيا  
ولقيتنى بعدك قلبى غريب ماليش طريق ولا ليا حبيب  
آه لو فضلنا صغيرين أحلامنا على أد السنين  
نفس المشاعر والحنين نفس القلوب الطيبين  
الحب كان بين الضفاير وفردتى شعرك راح وغاب  
وكأنه كان عصفور وطاير وبدأت انا رحلة عذاب  
اناديكى واشكى للرمل وابكى واحلم بموجه تضمنا  
انتى وانا.....انتى وانا





## روح عشيقه ..!!

من ارضنا واللا انتى من أهل الفضا  
من عهدنا أو من زمان راح وانقضى  
انتى اختيار واللا قدر انتى الطوفان واللا المطر  
انتى الأمان واللا الخطر حبك رجوع ولا سفر  
معرش اقول غير اللى جوايا  
مقدرش اعيش غير وانتى ويايا  
انتى الشراع والضى لسفينتى  
يا شمس عمرى واحلى ضلايه  
اللى بينا مش غرام حب عادى والسلام  
اللى بينا حب اكبر كل يوم بيزيد ويكبر  
حب اكبر من وجودى م المعانى والكلام  
يعنى كل كلمه حلوه يوم قالوها العاشقين  
مش هتوصف لون شفايفك واللا نظرات العينين





واللا خوفى من بعادك واللا افراحي بمعادك  
ايوه علشانك بدور عن كلام يقدر يعبر  
يوصف الاشواق يصور درت ادور ليل نهار  
جوه اعماق البحار واللا فى شمس النهار  
عن معانى بحسها عن اميره عشقتها  
اقدر اوصف بيها حالى والملاك اللى ف خيالى  
ايوه بسهر ليلى واسأل مين يجاوب عن سؤالى  
لو باقى ف عمرى ليله اتمنى تكون فى حضنك  
لو كلمه تكون أخيره تكون كلمه بحبك  
بعشقتك لا برضه اكثر لسه مش عارف اعبر  
لسه مش قادر كلامى يوصف الاحساس يصور  
يا لحظة صدق فى وجودى يا نهر العشق يا حدودى  
يا حب كبير يفرحنى ويالمنى يا قلب كبير بيكتبنى ويرسمنى  
بس بيدور السؤال انتى حلم أو خيال  
واللا عشق وروح عشيقه جايه تهدينى المحال





## حکمت ف يوم بحرمانى !!..

حکمت ف يوم بحرمانى هجرت الموج وشطانى  
وعشت سعيد ف حزن جديد وسبت القلب وحدانى  
يقاسى الذكريات والبعد ويبكى ع اللى خان العهد  
مبيفرقش فى بعادك ما بين الشوك وبين الورد  
وبين الضى والعتمه وصوت الناي وصوت الرعد  
لكن ماضعش العمر ما راحتش منى سيني  
لسه القمر بيطل والشمس بتدفينى  
والذكريات بتمر بتروح ساعات وتجينى  
ولما الدنيا ضاقت بىك رجعت بدمع مالى عنيك  
رجعت ذليل تمد اديك وتطلب منى غفرانى  
حکمت ف يوم بحرمانى  
رجعت لقلب يسامح بينسا قسوة امبارح  
ويغفر مهما كان الذنب ومهما الهجر كان جارح





عرفت الفرق بين قلبي وقلب الناس  
عرفت الفرق بين حبي وحب الناس  
عرفت ازای زمانی بیضحك ليك عشانی  
عرفت الفرق بين الغدر والإخلاص  
عرفت ان الدفا حضنی وراجع ناوی تسعدنی  
ترجع شمس ایامی وعن بعدك تعوضنی  
تحقق كل احلامی وعن احزانی تبعدنی  
عرفت انك بتهوانی وساكن نفس عنوانی  
هقولك حکم قلبي عليك حکمت ف يوم بحرمانی  
حکمت عليك بنسیانی





## وحشاني يا أمي !!..

في يوم رجعت البيت حزين غضبان من الناس والسينين  
لقتيني مرمة ف حضنها مسحت دموعي بكفها  
قالت كلام مفهمتهوش الدنيا فتح وردها  
واتارها بتقرا وترقيني وعلى الايام بتقويني  
وف ليله راجع عندها محتاج تاخذني فحضنها  
قالولي ماتت امي ماتت ولقتيني شائل نعشها  
البسمه ضاعت والفرحه ضاعت  
وعمرى ضاع مع عمرها  
وحشاني يا امه ودعوتك وحشاني  
بتمنى اشوف ضحكة عيونك تاني  
يارب جبالك حبيبه عشقتها حملت  
وربت وافتدني بنفسها  
ارحمها زي مرحميتني وارضيها زي مقويتني





علی اد ما فی اللیل غطتني او كنت بغیب واستنتنی  
علی اد ماصبرت وشالتنی بالجنه عوض صبرها  
رضاءك علیا بدعاها لیا والجنه تحت رجلها  
بدعی ف سجودی لسبب وجودی  
ولکل ام زیها  
كانت معایا فرحی ودوا یا هعیش لمین من بعدها  
قالولی ماتت حبیبتی ماتت علی کتفی شایل نعشها





## الأب .. !!

مبقاش فى الدنيا حد اطمن ليه بجد  
يمسح بإديه دموعى لسؤالى عنده رد  
بقيت فى الدنيا وحدى بقيت من غير حبيب  
بقيت بعدك ياوالدى فى كون آسى وغريب  
بعدك ماليش يا ابويا ظهر وسند وارض  
عنيك كانت بتحرس خطواتى كلها  
كانت دائماً دليلى خلاص غمضتها  
ان ظلمتنى الليالى هروح بعدك لمين  
يشفى الجراح يا غالى يحمينى م السنين  
فى حضنه يضمنى ويقولى اطمنى  
يهدينى بحكمته ع السكه يدلنى  
لأول مره احس بكلمة موت يا ابويا





بتقتل روح وحس تهد بيوت يا ابويا  
في أمان الله يا ابويا غمض عينيك ونام  
لا هتصحيك دموعي ولا هيصحيك كلام  
جايلك يارب حبيب محتاج لرحمتك  
في رضاك يكون له نصيب يتهنى ف جنتك





## قلب شاعر !!..

مع ان قلبي قلب شاعر موّت في القلب المشاعر  
حبيت كثير ونسيت كثير  
حنيت كثير وقسيت كثير  
مبقتش قادر احب واسهر  
ونسيت خلاص مبقتش افكر  
وقاسيت كثير من كتر يأسى  
مبقتش عايش غير لنفسى  
حضى اللى كان ليكى مبقاش يدفيكى  
كان صعب اعيش حبك واسهر لياليكى  
ايدى اللى كنتى بتلمسيها وياما نام خدك عليها  
مفضلش نقطة صدق فيها مات فيها ينبوع الحنان  
عيني اللى كنتى بتسكنيها مبقتش اشوف احلامى بيها  
نارى اللى كنتى بتعشقيها مبقتش نار صبحت دخان  
مبقتش فارس من زمان انا مت ومعايا الحصان





والقلب من كتر الأسيه ساب الضلوع وسكن اديا  
مبقتش يدق الا بأوامري عشان اكمل باقى عمرى  
الجب نار والشكل نور زى القمر رمل وصخور  
مش جنبه مفروشه بزهور سماه غيوم والارض بور  
متضيعيش عمرك كفايه عمرى ضاع  
متوهيش قلبك فى دوامة وداع  
انسى انك يوم قابلتى قلب مات  
واشطينى من سجل الذكريات  
مبقتش فارس من زمان انا مت ومعايا الحصان..





## انتَ حلم .. !!


خليك معايا هنا الماضي مش ملكنا  
نتحاسب انتَ وانا من يوم ميلاد حبنا  
مع انى قبل لقاءك قضيت ليالى معاك  
تواعدنى واستناك واحلم بقربك هَنا  
اتقابلنا واتعاهدنا ع الغرام كل دا قبل اللقا  
كان فى المنام  
نفس المشاعر والملامح والكلام نظرة عيونك  
حتى لونك والسلام  
يعنى كل الماضي كنت معايا فيه كنت فارس  
حلم ياما حلمت بيه  
عشت قبلك ليك لوحدهك صنت قبل لقانا عهدك  
كنت اطولك ضفايرى نفسى توصلك فى بُعدك  
ما انتَ حلم حلمته وانا لسه بضفاير  
ما انتَ وشم رسمته ع الحيط والستائر





لما شجرة جسمى تطرح كنت اضم مرايتى وافرح  
واجرى انام علشان اقابلك واقضى طول الليل فى حضنك  
فرشتك فوق اعلى نجمه فرشتك ندهتلك  
والورد مالى سكتك

يعنى من ليلة ميلادى كنت لعيونك بنادى  
كنت عمرى كنت زادى كنت ايامى وبلادى  
كل املى تكون حياتنا زى احلام ماضى فاتنا  
الغرام يسكن فى بيتنا وف كلامنا وف سكاتنا





## المحمول..!!

قادر اشوف الكون من غير عيونك كون  
بعيوني وحدى اكون ومش بأى عيون  
قادر أعيش وهعيش ناسى اللى مر حمنيش  
اللى وقت احتياجى لحضنه محضنيش  
تليفونى ثابت او محمول بكلامنا كان دايماً مشغول  
ع الخط كان قلبين على طول والشبكه عشقت موالنا  
وف لحظه زى امنا حوا خرجتى آدم م الجنه  
نفس الكلام مبقاش هوا وقطعتى كل خطوط بيننا  
نمرة تليفونك وقتها حفظتها وعشقتها  
دلوقتى انا دلتها لأنى مش محتاجها  
مبقاش خلاص بيننا اتصالات مبقاش رسايل ولا رنات  
مبقتش هسمعلك حكايات كل اللى بيننا اهو ماضى وفات  
هنساكى واكنسل أرقامك وان مره طلبتك مترديش





## حالة حب..!!

حالة حب دائماً عايش حالة حب  
ودا من حقى طول ما انا باسمع دق القلب  
عايش دائماً بالاحساس نبضى ودمى والانفاس  
ليه بتقولى علينا كبرنا عمر السن ما هيغيرنا  
مش ناسيين حبنا فى الزحمه دائماً بيننا موده ورحمه  
شايفك دائماً ورده جميله زى ما كنتى ف اول ليله  
مش كلنا بنحلم صغير او كبير  
مش كلنا بنحلم زى العصفور نظير  
مش كلنا بنعشق من الورد العبير  
رحلة عمر قضيتها معاكى كنت بطير دائماً فى سماكى  
همساتك حب لمساتك حب انفاسك حب احساسك حب  
انا وانتى اتنين اشتركوا ف قلب  
يعنى كبرتى ما انا زيك فى السن كبرت





اتغیرتی ما انا شعری شاب واتغیرت  
 لكن قلبی لسه صغیر من یوم ما اختارك واخترت  
 لا انا فکرت ف غیرک لحظه ولا فکرتی ف یوم تنسینی  
 دایماً عندی اجمل ورده فوق احزانی بتعدینی  
 کنتی غرامی ولسه غرامی ایوه ولسه فتاة احلامی  
 کنتی هیامی ولسه هیامی وغرامک شعری والهامی  
 لسه الفرحة اللى ف ایامی وعیونک حقنی وبرشامی  
 انتی جزیرتی اللى بعیش فیها وانتی سفینتی وبحرغرامی  
 طول عمری بسمیکى حبیبتی والناس بیسموکی مدامی





## ازای عیونک تخون...!!

مبقتش تفرق معایا معایا او مش معایا  
منک تگون النهایه منی تگون النهایه  
نحب نکره نغیر مبقتش تفرق کتیر  
نسر کتیر او ننام م القلب کان او کلام  
بالصلح او بالخصام هنروح لنفس المصیر  
ایام تفوت او لیالی حقیقه واللاف خیالی  
رخصت او عندی عالی صوتک هدیل او زئیر  
ازای عیونک تخون وازای عایزنی اسامح  
بین الشکوک والظنون مبقاش لحبک ملامح  
مبقتش احس بوجودی جمیله او مش جمیله  
وازای هلون خدودی وضحکتی مستحیله  
لو سندریله زمانی او مونالیزا فمکانی





كرهت لون فستاني وكرهت حتى المرايا  
قلبي اللي عاش لك زمان وسقاك محبه وحنان  
ما لقاش في حضنك امان بمقاش لحنك اسير  
مبقتش تفرق معايا مبقتش تفرق كثير





## لعبه ..!!

قولتيلي بحبك قولتيها وبقالي زمان مستنيها  
صدقت الدنيا وصدقتك صدقت الأحلام وعشقتك  
حسيت الكلمه ومعانيها وبنيت أحلام عمرى عليها  
حببت أيامى ولياليها وبقالى نصيب فيكى وفيها  
قولتيلي مفيش غيرك ليا فارس أحلامى الوردية  
اخترتك من كل الدنيا ورجعتى تانى حسبتيها  
وصحيت لا لقيت حضنك جنبى ولا قلبك وعنيكى حبايى  
لا انا قادر اطول نجمة حبى ولا لاقى أرض امشى عليها  
حدوته وكنتى بتحكيها وعليا ف يوم مثلتيها  
صدقت عيونك وشفافيك صدقها القلب وعاش ليها  
كان كل ما فيكى بيندهلى ويقول محتاجلى ومشتاقلى  
كات لعبه وياما لعبتيها على غيرى وياما رسمتيها  
مليتى اللعبه كسرتيها وكأنك يوم ما عرفتيها  
كان كل منايا ابقى معاكى دلوقتى منايا انسى هواكى  
أسهرلك ليه واستناكى قصتنا بإيدك نهيتيها





## عطله رسميه ..!!

ياللى عرفتوا الحب قبله عشتوا الحياه احضان وحنيه  
وانا اللي تهت ف برد ايامى ضاعت سنين العمر بإديه  
النهارده عطله رسميه النهارده اجازه دوليه  
لما شاور قلبى على قلبك واما ندهت عينى على حبك  
وابتديت اعرف فوايد قلبى وعينيه  
النهارده وقفت الساعات النهارده ضحكت الدمعات  
لما فجأه شفتك انتى وانكتبلى انك حبيبتى  
مين كان يقول بعد الزمان ما عدى  
مين كان يقول نتقابل النهارده  
مين كان يقول تهوانى اجمل ورده  
واحس قلبى بيفرضك عليا  
واحس إنك نور لضى عنيا  
كنت رافض ارتبط بأى واحده  
وكنت راضى اعيش بقيت عمرى فى وحده





لكن عيونك صحووا قلبي من بيات  
خلوني اندم ع اللي راح مني وفات  
مبقتش حاجه وانتى حاجه بقيت انا وانتى حاجه  
فهمانى وبقيت افهمك منغير كلام  
دايمآ عيوني تكلمك بالابتسام  
بقيتى خلى بقيتى ضلى  
وباقى عمرى اللي فاضلى  
سامحينى معرفتش طريقك من زمان  
مع انى دايمآ كنت محتاج للحنان  
كان نفسى اعيش العمر جنبك  
وف حضنك اسمع دق قلبك  
وف حضنى اديكى الامان  
لكن اللي باقى ف عمرى لو كان حتى يوم  
هاخذك واطير فوق السحاب بين النجوم  
ولكل نجمه هقدمك واقول حبيبتى  
النجمه هتقول روعتى من نورك انتى





يا احلى حاجه ف دنيتي  
لا دا انتي كل دنيتي  
انتي اللي راح وانتى اللي جاى وانتى طريقي وخطوتي  
وعشان بعثلى ربنا اجمل هديه وعشان لقانا فرح عم الدنيا ديا  
النهارده عطله رسميه النهارده اجازه دوليه





## عِشِّي اللَّحْظَه ..!!

وبتسألِي في الجأى ليه منا ياما طمنتك عليه  
هنعِش دايمًا في قلوب بعض عندي سؤالِي وعندك رد  
خايفه مني والا خايفه عليا والا خايفه م الليالي الجايه  
كنتي قبل لقانا ايه وانتى بعد لقانا ايه  
كنتي تايهه زى ريشه في الهوا جوا حضنى عشنا أحلامنا سوا  
ليكي عاشق م الهوا بيخاف عليكي  
ايوه عاشق جوا قلبه بيداريكي  
بعد غربه عشتى فيا وعشت فيكي  
وف عيونى سكنتى وسكنت ف عينيكى  
من زمان ايوه شفتك من زمان  
من زمان واسمى واسمك ع الحيطان  
منقوشين بالنور في جدران المعابد  
ع المسلات والكنائس والمساجد  
يعنى ارواحنا البريئه من زمان عاشوا الحقيقه





عاشوا قبل لقانا بألاف السنين  
صانوا سر هوانا والشوق والحنين  
حب اكبر من حياتنا حب مخلوق جوا ذاتنا  
شوق ملينا بينادينا للى جاى وذكرياتنا  
تكبرى يكبر هوانا تسهرى يسهر معانا  
عيشى اللحظه معايا بنعيش احلى حكايه  
ليه هنفكر ف اللى هيحصل ومافيش بيننا نهايه  
اوعدك هتكونى جنبى انتى وعيونك حبايى  
حب بينور شموعنا ويايديه يمسح دموعنا  
لو نغيب عن بعض لحظه حبا يضمن رجوعنا





## كنت بحبك مجنون ..!!

مبقاش خلاص يفيد تهديك والوعيد  
انك هتسبيني وحدى وهتبدأ من جديد  
كان لو بالبعد تهدد الروح عن جسمي بتبعد  
واركع لغرامك واسجد كنت بحبك مجنون  
كنت اما معايا بتسهر الروح جوايا بتسهر  
كات عتمة ليلي تنور واحلم مع أحلى عيون  
ولا يمكن لحظه اتصور انك ممكن تتغير  
وانك ع الهجر هتقدر تبعد تغدر وتخون  
مكنتش بتفرق عندي طول ما انت حبيبي لوحدى  
وبقول دا سحاب ويعدى احساسى ده كله ظنون  
كان لما ف لحظه تكشر لو عز الصيف بتمطر  
والشمس تغيب ولا تظهر والتلج يغطى الكون





مبقتش ف نفس غلاوتك لا لسانی بینطق سیرتاك  
ولا عینی بتعشق صورتك ولا بخضع مهما يكون  
ما انت اللى بدأت بهجرى وقتلت زهورى وشجرى  
وزرعت العتمه ف فجرى وبقیت على قلبی تهون





## مبقاش من حقا...!!

مبقاش من حقا نتقابل وحدنا  
تلمس ايدك اديا تسند راسك عليا  
مبقتش الشمس تصحا على دقة قلبنا  
مبقتش قلوبنا تفرح لمعاد ولا هجر يجرح  
مبقاش ع الارض مطرح لغرامنا وحبنا  
مش حاسه بالامان ومليش فى الكون مكان  
ومليش حبيب فى حضنه يدارينى م الزمان  
بنسلم للجراح ونقول مكتوب علينا  
وبندم ع اللى راح وضيعناه بأدينا  
وكان يومها السبب لحظة شك وغضب  
نادينا ع الفراق لما علينا انكتب  
خرجت من مصيرك وخرجت من مصيرى  
خلاص بقيت لغيرك وخلص بقيت لغيرى  
عرفنا ازاى فى لحظه ندمر حلمنا





لكن رغم اشتياقنا وقسوة ليل فراقنا  
والحزن اللى ف طريقنا هنكمل عمرنا  
بموت فى كل ثانیه بتمر ف بعدى عنك  
وبكره اعيش ف دنيا ف يوم حرمتنى منك  
باخذ صورتك ف حضى واحلم ترجع تاخذنى  
واسمع صوتك بودنى مع انك مش هنا  
مبقاش من حقنا نتقابل وحدنا  
تلمس ايدك اديا تسند راسك عليا  
مبقش الشمس تصحا على دقة قلبنا  
مبقاش مبقاش مبقاش من حقنا





## اسمك وطن...!!

لو كان لي في الوجود غيرك حزن وسكن  
كنت نسيت العهود كنت هجرت الوطن  
ونسيت كل الوعود ورضيت حكم الزمن  
لكن حبك في دمي كره بيضا وكوره حمرا  
بيمر ف كل جسمي بيغوت مع كل دوره  
يعني بشوفك بعينك وبتشوفني بعنيا  
وبدور في بحور سنينك والمس نفسي بأديا  
حببت فيك البراءه في زمان مفيهوش برئ  
وكتبتك في البطاقه الصاحب والطريق  
اسمي واسمك في خانه اسمين بقوا اسم واحد  
حتى ف خانه الديانه ديانتنا حب واحد





كلمة حرمان محاله مبقاش الحب حاله  
دا طريق بمشيه واقرب وبشرق فيه واغرب  
لا بتوه ولا منى يهرب واعطش من حبك اشرب  
انت الكون والزمن والاحضان والسكن  
لما اكتب اسم وطنى بكتب اسمك وطن





## خصم .. وحكم !!..

طفل صغير يبصرخ فين امه وفين ابوه  
كانوا ليه سبب وجوده وليه هجروا وسابوه  
يواجه الخطر والبرد والمطر  
يبكى لاحد يسمع ولا اهله بيرحموه  
مش هيا دي العيون ولا هيا دي الشايف  
مش دا القلب الحنون اللي على حبه خايف  
مين فينا اللي ظلم ومين اللي اتظلم  
ومين وقت الفراق كان خصم وكان حكم  
مش دا الحب اللي كان زى الطفل ف قلوبنا  
بنصونه مهما كان وبنغفر بيه ذنوبنا  
مين كان فينا السبب مين فينا ف لحظه باع  
مين فينا الى كتب على احلامنا الضياع  
الليله راجعه ليه من بعد ما طفلى مات  
انا بوسته من عينيه ودفنته من سكات






## مش من حَقك ..!!

مش من حَقك تنسا هو انا ف غمضة عين  
مش من حَقك قصتنا بيملكها اتنين  
عايز نبعث عن بعضينا قوللى اروح انا فين  
من ليالينا وكل ماضينا من قلبي وم العين  
بعد سنين ضمتنا سوا جى تقوللى كفايه هوى  
تشهد دموعى عليك يشهد سهر الليالى  
تشهد عليا عنيك يشهد قلبك ياغالى  
مش دا الطريق من اوله اللى اتعاهدنا نكملة  
لو يوم هتنسا مين انا ارجع لقلبك واسأله  
هيقول دوا الأحزان انا والنبض والشريان انا  
وانى ف هواك ضحيت معاك وزرعت ايامك هنا  
مش بقلل من كرامتى لما بتمسك بحبك





وارفض انهي معاك حكايتي واحتكم للناس وقلبك  
أنا مش اد ضياع الحلم ولا أد الإحساس بالظلم  
حقك تؤمر قلبي يطيع مش من حقك منى تضيع  
حقك اكون واحة احلامك انما تبعد مش من حقك  
مش من حقك تنسا هو انا ف غمضة عين  
مش من حقك قصتنا بيملكها اتنين






## بجر الذكريات..!!

جی تانی لیه تقوللی لسہ حبك عندی عالی  
مش انا اللی خنت عهدك واللا ضیعت اللیالی  
جی تبکی لیه وتندم بعد ما راح اللی راح  
بعد ما نسیتنی حبك جی تانی تقول سماح  
بعد ایہ جی تواسینی بعد ایہ اللی کان  
بینك وینی یسوی ایہ  
یسوی ایہ الغدر بیا یسوی ایہ یسوی ایہ  
ودموع عنیا تسوی ایہ  
کان زمان لمسة ایدیك بتصحی حبی کان زمان  
کان زمان دمعة عینیك بتبکی قلبی کان زمان  
کان زمان خوفك علیا یدی للقلب الامان  
كنت بتمناك معايا ف وحدتی ف ایام اسایا  
لكن العمر اللی فات یمحی اغلی الذکریات





يمحي كل كلمه حلوه قلتهاالى وقلتهاالك  
 يمحي حتى كل خطوه فى الميعاد كنت امشيهالك  
 كنت ادارى ع العوازل كنت اقول ما تفرحوش  
 يوم هيبجى دا احنا بيننا عهد غالى ما ينساهوش  
 وفضلت احافظ ع اللى بينا للنهايه  
 حفظت حبي وصنت ايامك معايا  
 كنت فاكر لما ترجع هتلاقينى ف انتظارك  
 ابكى من شوقى واقولك الفراق دوقنى نارك  
 انا اللى كنت بالصبر اداوى قلوب الناس  
 وانا اللى كانت بسمتى تملا الوجود احساس  
 نسانى غدرك بسمتى والفرح راح من دنيتى  
 ياللى كنت زمان حبيبي اتنسا حبك ومات  
 كل شئ كان حلو بيننا تاه فى بحر الذكريات






## اتاگردی ..!!

اتاگردی قلبی معاکى بيبندى يتسمى قلب يعرف يحب  
وبنور عينكى بيهتدى اتاگردى  
زى الطفل بيبداً عمره زى الليل ميقابل فجره  
زى الطير مبيعشق شجره قلبى معاكى بيبندى  
وكأن لحظة ميلادى لحظة مجيتى ف ميعادى  
لحظة تلاقى العيون لحظة سلام الأيادى  
لا سمعت كلام زى كلامك ولا شفت غرام زى غرامك  
لا صالحنى زمان ولا دقت حنان ولا عشت ف يوم غير أيامك  
مبقتش احلم غير بعينكى مبقتش بخاف الا عليكى  
مبقتش اشتاق زى العشاق ساكنه ف دمي وساكن فيكى  
باتحدى الدنيا يا خلاصك وبطعم الصدق ف إحساسك  
وكأن الكون ما فيهوش غيرك ولا بسمع فيه غير انفاسك  
وكأننا آدم وحواء وبنسكن الكون وحدنا  
الحب بيتنا وذادنا هوأ وشموع تنور عمرنا





مش قادر اصدق ولا افكر ولا حتى اتخيل واتصور  
منغير الوان وف لحظه كمان لونتی حیاتی بلون اخضر  
نورتی شموع ومسحتی دموع رشیتی علی الأحزان سكر  
اتاكدی قلبی معاکی بیبتدی يتسمى قلب يعرف یحب  
وبنور عنیکی بیهتدی اناكدی اناكدی






## تخاف علیک منی...!!

قابلتک یا حبیبتی بعد ما فات الأوان  
بعد مضیعت عمری وراح منی الزمان  
اجمل ایامک جایین لکن ایامی رایحین  
کنت بکذب نفسی واقول الحب ما يعرفش سنین  
انا مش انانی ومستهلش تبیعی احلامک عشانی  
صحيح بقیتی الدنيا لیا بقیتی نبضی ونور عنیا  
محتار ما بین احساسی بیکی و بین صراع عقلی وجنانی  
ظهرتی ف عمری لیه من بعد ما عمری عدی  
هتاخدی منی ایه یا احلی واغلی ورده  
الفرق کبیر ما بین امبارح والنهارده  
انا قلت خلاص هیبقی قلبی منغیر حبیب  
ظهرتی ف عمری فجأه فجر بیحضن مغیب  
اشمعنی انا من بین الوف حبی ینادیکی





اشمعی انا دا انا کلی خوف م الشوق علیکی  
بتقولی سمعتی عنی وقلولک انی وانی  
فی غرامی ما لیش مثیل نسیانی مستحیل  
کل الی اتقال حقیقه لکن من کام سنه  
وعشان سازجه وبریئه مش شایفه منی انا  
تجاعید ولا شعر ایض ولا قلب عجوز بيمرض  
ولا فرق ف عمرنا ولا ایه مکتوب لنا  
بجک آه لکنی بصدک غصب عنی  
وعشان سنک وسنی بخاف علیکی منی





## ورق التوت...!!

اتكلمى خايف هوايا يموت اتكلمى هيضيع هوايا سكوت  
واللا انتى عايزه تأجلى حلمى لما تشوفينى جثه جوا تابوت  
انا كنت آدم عارى قدامك خليكى حوا وشيلى ورق التوت  
نفسى المسك وتكونى محتاجه المسك  
اتنفسك وتبات عيونى تحرسك  
وكأنى نقطة دم جوا شريانك عايشه عشانى  
الحلم وعايشه علشانك  
ازاى شفايفك لسه عاجزه عن الكلام وازاى  
سكوتك يبقى شلال م الآلام  
قلبك حجر بتسلمينى للقدر قلبك  
أمر ليلى ونهارى يكون سهر  
بهون عليكى وعمرك ماهنى عليا والمس





ایدیکى تفرح سنینی الجایه  
بتکلمینی واکلمک فی خیالی ویاما نمتی  
ف حزن قلبی لیالی  
عایش وحید حایر عمری ورق طایر مش  
لاقی مرسی ولا قادر انسی  
خایف اوی یقتل هوایا سکوتک خایف  
اوی یفوتنی یوم ویفوتک  
ابعد صوتک ینادی علی قلبی وتوعدی  
یقربلک فؤادی تتوهی وتبعدی  
بردان اوی والبرد عشش فی سنینی بردان  
اوی محتاج لحزن یدفینی  
حیاتی حروف ملخبطه ربیعی خریف صیفی شتا  
قولی بحبک اورافضه حبک مش حاسه بیک والذنب ذنبک  
وان وعدی اعیش لوحدی وقربی منک زی بعدی  
مش هتحمل طول عمری م الصمت هیفرغ صبری  
لو فضلتی السکوت ومجاش لسؤالی رد  
هبعدهنک واموت فی حزن ای حد





## تاهت احلامنا منا ..!!

تاهت احلامنا منا في زمان مبقاش زماناً  
كانت ايام وكنا يسقينا نقول كمان  
لكن غدرك غيرني هددت كتير تهجرني  
مبقتش ف يوم تعذرني ولا حاسه معاك بأمان  
اديتك كل ما عندي ورضيت بنصيبي ووعدى  
ضحيت بسمايا وارضى ومخدتش غير احزان  
واتارينى بعيش فى خداع لك كل مناسبه قناع  
بتسمى الهجر وداع وتسمى القسوه حنان  
وبتسأل بهرب ليه م الحب ومن لياليه  
منا بُعدك خدت عليه وقدرت على الحرمان  
من قبل ما تبعد هبعده مش هر كعلك ولا هسجد  
لو بُعدك شمسي هتبعده لو قلبى يعيش عطشان  
بعد ما حبك ضيعنى لا هقولك ولا تسمعنى





لا كلامك هيرجعني ولا يوم يجمعنا مكان  
هنسي ان ف حزنك فجرى كان دايمآ يطلع بدرى  
وهحايل بعدك قلبى يغفر احساسى بذنبى  
وكأنه ما دق لحبى وكان الحب ما كان  
وابدأ مع قلب يقدر يدنى مشاعر اكر  
يقدر على قلبى يآثر ويفجر فيه بركان





## لحظه .. !!

كنت فاكراً لما اقابلك مره ثانيه مش هنتلقى  
يوم لقانا غير كلام  
كل واحد فينا عاش في البعد دنيا واللى  
كان ما بينا تاه وسط الزحام  
واتقابلنا مره صدفه ايوه كانت احلى صدفه  
شفت عيني بتجري وبتحضن عينيكي د  
ق قلبى بينتفض من شوقه ليكي  
لحظه فيها حقيقى عشت ايوه بعدك كنت مت  
كنت تايه وسط غابه ولطريق النور رجعت  
افتكرنا ساعتها قلت وقتلى ايه  
كنتى حلمى وكنت حلم حلمتى بيه  
كنا حضن الحب وشفايفه وعنيه كنا ماضى  
جميل فضلنا نعيش عليه





يومها قلنا كلام كثير من غير كلام وف قلوبنا ا  
لحب مارد نام وقام  
قام ياخذنا للى فات قام يصحى الذكريات  
الايدى اتشبت غنى القمر والطيور اتبسمت فوق الشجر  
والزمان مبقاش زمان اتملى حب وحنان  
يومها مكنش مبينا عتاب حكم البعد ماكنش بأيدنا  
عشنا احباب وبعدها احباب والايام حكمت ببعدها  
حته منى ولسه منى والزمان خانك وخننى  
وف لحظه وسط الاحلام رجعت احزان الايام  
الفراق خبط على شبكة ايديا وشبكتك  
قالى ليك سكه وليكى سكتك  
سكة الماضى اللى راح من عمرنا  
واللى عاشها كل واحد منا  
شفت الدمع ف عنىكى شوفتى الحزن ف عنيا  
مش عايز اسيب اديكى اللى بتحضن ايديا  
وافترقنا مره تانيه زى ما ف لحظه التقينا  
كل واحد راح لدنيا بس عاش الحب فينا





## خایف علیکی...!!

خایف علیکی م السفر خایف علی حبی الوحید  
یا اُغلی من کل البشر ازای اعیش وانتی بعید  
خایف علیکی تهجری بستانی ومشفش یوم ضحکة عیونک  
تانی


دانا کنت بشتاق وانتی جنبی لعینکی وشفایفک حبایی  
اعمل ایه بعد السفر لما هیغیب القمر  
والقا نفسی غصن غابت زهرته  
یبکی قلبی بین ضیاعه ووحدته  
لما عنی ف یوم تغیبی قولی مین هتقول حبیبی  
لما اشکی مین هتسمع شکوتی واما ابکی مین هتمسح  
دمعتی

مین یا اُغلی الناس یا عمری هیصاحبنی ف غربتی  
ما انتی عارفه انی غیر حزنک





مليش وانتي شايفه انى لعيونك بعيش  
يعنى بعدك او فى بعدك الحياه متهمنيش  
لو بأيدى لما قولتى فى يوم هسافر لو بأيدى  
كنت قطعت التذاكر  
كنت خبيت الحاجات كنت وقفت الساعات  
كنت حلفتك يا عمرى باللى جاى وباللى فات  
لكن المكتوب عليا تبكى م الاشواق عنيا  
افضل استنى واستنى واستنى وافضل اتمنى واتمنى واتمنى  
تجيني فرحه تملأ احلامي ولما اصحى القاكي قدامي  
عايز اقولك ان كلك حر شمسك ولا ضلك  
كل نقطه وكل حاجه فيكي قلبي سايبهم امانه بين ايديكي  
اتكتب ليكي السفر واتكتب ليا السهر  
اتكتب خوفى عليكي لو مسافره والا راجعه م السفر





## الحلى اغانى...!!

مش هقولك يوم بحبك اللى ياما كتير قالوها  
مش هقولك انى جنبك بملك الدنيا وما فيها  
الكلام مش هوا غايته عمره يوم ما كان هوايتى  
انما الاحساس فى قلبى والامانى وحلم عمرى  
حتلاقيهم ف ابتسامه فى انتظارى ليك وصبرى  
كل كلام فى الحب اتقال كل حقيقه وكل خيال  
مش حيصور فرحة قلبى بابتسامتك وانت جنبى  
واللا لحظة شوق فى بعدك واللا حيرة قلبى بعدك  
باسمع قلبى يقولك حبك غالى عليا  
ودموع عينى تقولك انت النور لعنيا  
انت الماضى وانت الحاضر وسنين عمرى الجايه  
وانا جنبك ايامى ثوانى وبحب الايام وزمانى  
ياللى كلامك احلى اغانى على اوتار قلبى ووجدانى





قرب منى كمان وكمان خلى البعد كأنه ما كان  
ياللى معاك الدنيا امان ما بنسمعش عن الاحزان  
مين قال ع الحب كلمه وعلى الاحساس كلام  
مين قال دا الحب عندى ما بيوصفهوش كلام  
لكن حبي ومشاعرى وصورتك فى المنام  
اقوى من كل كلمه اتقالت فى الغرام





## اظلم ..!!

اظلم اوى احرم اوى اجرح اوى افرح اوى  
ابنى السدود خون العهود ابعده بعد اوى  
صدقنى انت الخسران هتعيش عمرك عطشان  
لا هتلقى زى هوايا ولا لحظه قضيتها معايا  
ولا زى حكائتى حكاية ولا زى حنانى حنان  
سلمت لسحر عينيك مبخلتش مره عليك  
اديتك كل مشاعرى زى العصفور فى ايديك  
اما انا وحدى هنا بعد الفراق  
يمكن احزن يمكن أشكى يمكن  
اسهر ليلى أبكى  
يمكن اصرخ من عذاب الاشتياق  
ايوه هحزن لما احس بوحدتى  
كنت دايماً بتشاركنى دنيتى





كنت عمرى كنت جنه كنت نار  
كنت حزن كبير يساعنى ليل نهار  
دائماً اظلم بكى قلبى م الألم  
مش هسلم مش هعيش لحظة ندم  
مهما قالوا الناس عليك مش هقول جرحى يايدىك  
مش هقول للناس ظلم مش هقول للناس ظلم





## اخيراً قَلتُها ..!!

اخيراً قَلتُها وبقلبي سمعتها  
كلمه لا سمعت أغلى ولا أحلى منها  
اخيراً قَلتُها لي حققت اللي ف خيالي  
فرح الأيام ندالي من رقة نطقها  
لقتني غصب عنى بابكي واضحك واغنى  
باحضن كلمة بحبك وارقص على لحنها  
ياما اتمنيتها منك وداريت احساسى عنك  
كان قلبي يقولى انك هتقولها ف وقتها  
طول عمري هعيش اسيرتك وكفايه اكون حبيبتك  
وكفايه تكون حبيبي م الدنيا كلها  
حسيت ان البدايه لعمري من هنا  
حسيت ان الحكايه حكاية عمرنا





اكونلك يا منايا وتكونلى يا أنا  
نعيش فوق السحاب على نجمه ملونه  
نسى سنين العذاب ونحقق حلمنا  
يا سنين بتدورى بينا يادموع قاسيه وحزينه  
مبقتش تشوف عيننا غير فرحه نعيش لها  
اخيراً اخيراً.....اخيراً قلتها





## لحظة ضعف..!!

في لحظة ضعف مني حبيتك غصب عني  
انا وقلبي الكبير  
وشفتك نجم عالي بينور لي الليالي  
ويحدد لي المصير  
سلمتك كل امري ولقيت وياكي عمري  
لأيامك اسير  
اتعلمت كثير في هواكي اتعذبت كثير  
اتعلمت اطير في سماكي واتعلمت اغير  
كنت بشوف في هواني هنا كنت اتمنى تجيني هنا  
واسمع صوت انفاسك تاني وانتي ف حضني  
واسمع دقة قلبك احلى لحن ف ودني  
واتاري فعذابي سعادتك قلبي دقاته بإرادتك  
مش غلظتي اني هويت وبكل شئ ضحيت





وحفظت عهدى معاكى حب وموده وبيت  
لكن م اللحظادى ههرب من دنياكى  
وانسى سنين الماضى اللى قضيتها معاكى  
مش ههسلم يوم ارادتى حبى مش هيكون عبادتى  
حتى لو ضاعت آمالى حتى لو ضليت سعادتى  
م الليلادى هقتل الحب ياديا م الليلادى  
هلغى صورتك من عنيا  
انسى الماضى وانسى الحاضر واحيا ايامى اللى جايه  
ابتدى قصه جديده ما افتكرش تكون سعيده  
لكن ارحم من عذاب شوقى لعينيكى  
ايوه ارحم من دموع تنده عليكى  
يا قمر م الليله مش هتشوفنا تانى  
مش ههسهر مش هقول فى بهاء اغانى  
ما انت ما قدرتش تحافظ ع اللى بينا  
ما انت ما عرفتش تنور ليل سنينا  
مش ههسلم يوم ارادتى حبى مش هيكون عبادتى  
حتى لو ضاعت آمالى حتى لو ضليت سعادتى





## هنبداً من جديد ..!!

صدقت كلام الناس ونسيت ايامى خلاص  
وبنيت شكك على كدبه ملهاش معنى ولا اساس  
ما انا ياما سمعت عليك من ناس بتشكك فيك  
معملتش زيك ليه مبعدتش عنك ليه  
علشان انا حبك عندى اقوى من الشك وحيرتى  
بيصحى النبض ف قلبى ويقول للحيره انسيه  
مش انا اللى اخدع واخون وارسم الشوق ف العيون  
دا انا حبيتك حب يخلى حتى جراحى معاك بتهون  
انت حبيبى وقلبي يقولها قبل لسانى  
انت حبيبى اللى معاه بتحدى زمانى  
متصدقش كلامهم تانى متفكرش ف يوم تنسانى  
لو يوم تسمع كلمه عليا ابقى اسألنى وارد عليك  
اعرف مين بيشكك فيا وتشوف ظلمى معاك بعنيك  
شفت كلامهم خدنا لفين كان هيضيع حب سنين





كان هيخلي الفرحة دموع والبسمه اللي ف عمري انين  
دا احنا هوانا يا عمري رغم كلام عزالنا  
زي الطفل بيكبر ويزيد بين احضاننا  
ياللي بتغيروا مننا اعشقوا وحبوا زينا  
تلقوا ف ليل الغربه شموع والاحزان افراح وهنا  
اكبر يا حب وزيد وانتي اكرتي يامواعيد  
خلي الأفراح تغني والدمعه تروح بعيد  
رجعت ليالينا تاني وحبيب العمر جاني  
احتاج حضني وحناني وهنبداً من جديد





## الهجرينى...!!

اهجرينى اخدعيني ضيعى أجمل سنيني  
توهى تحت الأرض أو فوق السحاب  
بين عيدان الورد أو بين الضباب  
مش هتاخدى الحب منى جوا قلبى غصب عنى  
بيه بعيش ايام حياتى شمعته بتنور ليالاتى  
ملكى انا حبى ليكى ملكى انا  
ايوه حبك ملكى وحدى ايوه حبك ملكى انا  
اهجرينى وانسى وعدك مش هتوه فى الدنيا بعدك  
أما حبك هوّا عمري مش بإيدى أو بأمرى  
اختار قلبى أنا اختار لو نار هيكمل المشوار  
ومش بإيدى أرجعك ولا كان بإيدى أودعك  
افترقنا آه من فراقنا آه الزمن يسبقنا واحنا نجري وراه  
ماليش أمل ف لقانا تانى ماليش أمل  
كتب عليا الشوق زمانى ماليش أمل





اهجريني عذبينى افرحى بصوت انينى  
بكره لازم تندمى ايوه بكره هتندمى  
لما تصحى تدورى ع الحب تانى وتحلمى  
اهجرينى اجرحينى بكره فيهِ مش هتلاقينى  
ياللى معايا ف كل مكان من فين هيجينى النسيان  
انسى كمان توهى كمان خلى الحب كأنه ما كان  
آما عن الايام تاخذى ازاي ايامنا  
تاخذى ازاي ليالينا وماضينا واحلامنا  
كل مكان شفنا ورحناه لسه بروحه واشوفك فيه  
حتى اللحن اللى سمعناه لسه على لسانى بغنيه  
اهجرينى اخدعيني ضيعى أجمل سنينى  
توهى تحت الأرض أو فوق السحاب  
بين عيدان الورد أو بين الضباب  
مش هتاخذى الحب منى جوا قلبى غصب عنى  
ملكى انا ايوه حبك ملكى انا  
ايوه حبك ملكى وحدى ايوه حبك ملكى انا





## وحشانی..!!

مع انك فى شريانى فى افراحى فى احزانى  
فى انفاسى ووجدانى وحشانى  
مع انك فى تكوينى شموع الضى لسينى  
موسيقى شعر واغانى وحشانى  
مع انك شعاع الشمس وصوت الهمس  
وروح النفس الحادى وايمانى وحشانى  
مع انك ورود الفرح آلام الجرح  
بحبك وانتى عشقانى وحشانى  
مع انك نجوم الليل وحضن جميل  
لأيامى وازمانى وحشانى  
مع انك قمر فى سماه واخذنى معاه  
واحلى زهور فى بستانى وحشانى  
مع انك قناديلى اتوه قلبك يناديلى





حروف اسمك مواويلي رموشك شط اوطاني وحشاني  
مع انك بداية عمر نهاية عمر  
اشباعي وحرمانني وحشاني  
مع انك مع اني غريب ويسكن الثاني وحشاني  
انا آدم أنا هوأ وكنتي الضلع يا حوا  
رجعلي الضلع بعد غياب سكنتي ضلوعي من تاني  
واتاري الدنيا بعد عذاب مع الأفراح مواعداني  
وحشاني.....وحشاني.....وحشاني






## العمر اللي فات..!!

رغم العمر اللي فاتوبعد المسافات  
مقدرتش انسى حبك ولا لحظه ف قلبي مات  
لما انتى هتسيبيني لشوقى ولحنينى  
كان ليه بتعلميني اعشق فيكى الحاجات  
لقيت ايامى بيكى وطريقى بنور عينيكى  
عرفت الدنيا جنبك وبقالى امنيات  
فى المهد مات وليدى وف لحظه الحلم ضاع  
ازاى رحلة هوانا تكون رحلة وداع  
راح عمرى وضاع هنايا وغيوم سكنت سمايا  
ليه اول الحكايه يبقى نهاية الحكايه  
تُهت ومركب حياتى خديتها الدوامات  
نفسى انساكى نفسى لو هنسى معاكى نفسى  
ازاى قدرتى تنسى همساتنا والسكات





انساکي کل همسه تقول دي حبيبي لسه  
انساکي کل کلمه بتصحى الذکريات  
ولقتنى فى بُعدك تايه وحيد بُعدك  
کل البشر اموات کل الشجر حيات  
کل الورود دبلت وصفيت الشمعات  
حتى القمر مخنوق والشمس مالها شروق  
کل الطيور تبكى بدل الاغانى آهات  
يا رياح يا سيول قويه يا ارض يا سما  
شيلوا صورته من عنيا لو حتى بالعمما  
واعمل بعيونى ايه من غير ما تشوف عنيه  
فى غياب حبي وحببيتى اعيش فى الدنيا ليه





## آسف..!!

جانى شهيد فى المنام قتله حزام ناسف  
يشكى بمر الكلام انا قولتله آسف  
لو كانوا ناس زينا لو خافوا يوم ربنا  
مكنش هان دمنا ولا اتقتل حلمنا  
لا عرفوا معنى الدين ولا فهموا يوم آيه  
وبوسوسة شياطين بكدبه وغوايه  
ف سكة الارهاب بيقتلوا الاحباب  
نسيوا ان لينا حساب والآخره فيها عذاب  
نسيوا ان فى ديان بيحاسب الانسان  
والآخره فيها ميزان يوزن جرس واذان  
بقتل طفل برئ هتدخل الجنه  
شياطين خدوك لطريق مبعثش يوم منا  
قتلت روح انسان مخلوق يعيش فى امان





بحق كل نقطة دم يوم سالت  
وبحق كل كلمه ف دينًا واتقالت  
لنجيب في يوم حقت نجيب طارق  
وف جنة الرحمن يكون دارك  
يارب يا قادر ع الخاين الغادر  
احفظ شباب امتي في الجاي والحاضر  
املا القلوب ايمان نورها بالقرآن  
ارحمنا يارحمان ارحمنا يارحمان






## مصر هتتصر !!..

ياللى قتلت الورد والعهد والزيتون  
ملعون فى كل الأرض وفى السما ملعون  
وعدوك بحور العين فجرت فينا بارود  
جعلوك غراب للبين من رحمته مطرود  
بتقتل روح خلقها ربنا تعمر  
مكان متروح بتزرع موت وبتدمر  
صدقينى مكش قصدى كنت راجع اوفى وعدى  
راجع اسكن نور عيونك واطفى شوق بعدك وبعدى  
كنت جوا القطر م الشباك بطل  
كان فى ايدى صحبتين ياسمين وفل  
طفل كان قدامى بين أمه وابوه  
يبتسلى ابتسم وارجع اتوه  
شايف حبيبتى عالمحطه بتنتظر  
هجري عليها ابوس اديها واعتذر





عن كل لحظه غبت فيها عنها  
واد ايه انا كنت محتاج حضنها  
قطري كان سابق زمانه زي فارس فوق حصانه  
نفسى اقبالك نفسى اشوفك تغسلى همى بكفوفك  
وف لحظه صحيت على موت ودخان  
والنار حواليه ف كل مكان  
الطفل مات اصبح رماد والذكريات سافرت بلاد  
خدتك فى حضنى انتى وانا والنار بتاكل حلمنا  
مع ان م الإرهاب قلوبنا بتتصر  
من فرقه الأحباب وحلم بينكسر  
بموت وعارف ان بلدى هتنتصر  
بموت وعارف ان مصر هتنتصر





## رسالة من شهيد ..!!

ازای نفرح یا عید ازای نلبس جدید  
وعیوننا فکل لحظه بتشوف جثة شهید  
یحرم علینا نفرح واخواننا مجروحین  
مهو جرحهم بیوجع قلوب المؤمنین  
دقت ساعة الادان اذن یا طبلاوی  
اشرح لنا القرآن فسر یا شعراوی  
اسلامنا یا انسان دین عدل دین رحمه  
بیخاطب الادیان بالعقل والحکمه  
لا شجع الارهاب ولا انتشر بالدم  
لا کان شریعة غاب ولا شابه یوم الظلم  
واللی عرفناه واتعلمناه کل بشر والدین لله  
سامعین صوت الشهد بینادی من بعید  
شایفک یا أمی من هنا من فوق سبع سموات





من اعلى درجه وربنا جعل الثواب درجات  
شفتك لما جريتى عليا لميتى اللى اتقطع فيا  
بوستى جبينى وحضنتينى وبإيدك سبلتى عنيا  
خدت كثير من ضعفك قوه علمتيني اصون العرض  
علمتيني الواجب هوا انى اموت فى سبيل الارض  
ابنك يا امه بقدره سعيد عشت لبلدى ومت شهيد  
شفت دموع فى عيونك يا امه مع زغرودة ليلة عيد  
عارفه يا امه شفت ايه لما انكشف عنى الحجاب  
شفت المصرى الحب ماليه يدى بلده بدون حساب  
بس مطلوب الاراده حب مصر يكون عباده



## الفهرس

رقم الصفحة	اسم القصيدة	م
٥	أصدقاء	١
٧	كرسيين وشمسيه	٢
٩	حب كبير	٣
١١	مسك و عنبر	٤
١٣	الخابين مش هوانا	٥
١٥	خلود	٦
١٧	شهدتك	٧
١٨	حبينى	٨
٢٠	ميت اكلينيكى	٩
٢٢	حب بجد	١٠

رقم الصفحة	اسم القصيدة	م
٢٤	بطلة قصتك	١١
٢٦	انتى وانا	١٢
٢٨	روح عشيقه	١٣
٣٠	حكمت ف يوم بحرمانى	١٤
٣٢	وحشانى يا أمى	١٥
٣٤	الأب	١٦
٣٦	قلب شاعر	١٧
٣٨	انتَ حلم	١٨
٤٠	المحمول	١٩
٤١	حالة حب	٢٠
٤٣	ازاى عيونك تخون	٢١

رقم الصفحة	اسم القصيدة	م
٤٥	لعبه	٢٢
٤٦	عطله رسميه	٢٣
٤٩	عيشى اللحظه	٢٤
٥١	كنت بحبك بجنون	٢٥
٥٣	مبقاش من حقنا	٢٦
٥٥	اسمك وطن	٢٧
٥٧	خصم .. وحكم	٢٨
٥٨	مش من حقاك	٢٩
٦٠	بحر الذكريات	٣٠
٦٢	اتأكدى	٣١
٦٤	بخاف عليكى منى	٣٢

رقم الصفحة	اسم القصيدة	م
٦٦	ورق التوت	٣٣
٦٨	تاھت احلامنا منّا	٣٤
٧٠	لحظه	٣٥
٧٢	خايف عليكى	٣٦
٧٤	احلى اغانى	٣٧
٧٦	اظلم	٣٨
٧٨	اخيراً قلتها	٣٩
٨٠	لحظة ضعف	٤٠
٨٢	ھنبدأ من جديد	٤١
٨٤	اهجرينى	٤٢
٨٦	وحشائى	٤٣

رقم الصفحة	اسم القصيدة	م
٨٨	العمر اللي فات	٤٤
٩٠	آسف	٤٥
٩٢	مصر هتنتصر	٤٦
٩٤	رساله من شهيد	٤٧